



Ein cyf/Our ref: MA-LG-1999-20

Mr Mick Antoniw AS/MS
Cadeirydd y Pwyllgor Deddfwriaeth, Cyfiawnder a'r Cyfansoddiad
Senedd Cymru
Bae Caerdydd
Caerdydd
CF99 1SN

SeneddLJC@senedd.wales

30 Mehefin 2020

Annwyl Mick

Adroddiad y Pwyllgor Deddfwriaeth, Cyfiawnder a'r Cyfansoddiad ar y Memorandwm Cydsyniad Deddfwriaethol mewn perthynas â Bil Pysgodfeydd y DU 2019-21.

Diolch am yr ystyriaeth y mae'r Pwyllgor wedi'i rhoi i'r Memorandwm Cydsyniad Deddfwriaethol mewn perthynas â Bil Pysgodfeydd y DU 2019-21 a'i adroddiad arno.

Hoffwn fanteisio ar y cyfle hwn i roi'r wybodaeth ddiweddaraf i'r Pwyllgor am y sefyllfa o ran craffu ar y Bil gan Senedd y DU a Senedd Cymru. Cynhaliwyd cam Adroddiad Tŷ'r Arglwyddi ar 22 a 24 Mehefin. Nodaf fod nifer bach o welliannau wedi'u gwneud ac, felly, byddaf yn gosod Memorandwm Cydsyniad Deddfwriaethol Atodol gerbron y Senedd. Bwriedir cynnal y Trydydd Darlenniad yn Nhŷ'r Arglwyddi ar 1 Gorffennaf a chaiff y Bil ei gyflwyno wedyn i Dŷ'r Cyffredin.

Am fod amserlen Senedd y DU ar ei hôl hi oherwydd COVID-19, tybiwyd bod angen gohirio'r drafodaeth ar y cynnig cydsyniad deddfwriaethol yn y Senedd, yr oedd disgwyl iddi gael ei chynnal ar 8 Gorffennaf. Fel yr amcangyfrif gorau, am nad yw'r dyddiadau ar gyfer pob un o'r camau nesaf yn Nhŷ'r Cyffredin wedi'u cadarnhau eto, rwy'n disgwyl mai'r amser priodol i gynnal y drafodaeth fydd ar ôl toriad yr haf – er mwyn ystyried unrhyw welliannau a wneir ar gam Pwyllgor Tŷ'r Cyffredin.

Bae Caerdydd • Cardiff Bay
Caerdydd • Cardiff
CF99 1SN

Canolfan Cyswllt Cyntaf / First Point of Contact Centre:
0300 0604400

Gohebiaeth.Lesley.Griffiths@llyw.cymru
Correspondence.Lesley.Griffiths@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Cyn gynted â phosibl, byddaf yn adfer dyddiad ar gyfer y drafodaeth ar y cynnig cydsyniad ac yn darparu'r holl wybodaeth angenrheidiol er mwyn i bob Aelod o'r Senedd roi ystyriaeth briodol i'w penderfyniad ynghylch cydsynio. Yn y cyfamser, rwyf wedi ystyried yr argymhellion ac wedi rhoi fy ymatebion yn yr Atodiad i'r llythyr hwn.

Goblygiadau ariannol

Bil fframwaith yw hwn a bydd angen ystyried sut y byddwn yn rhoi'r swyddogaethau newydd ar waith, yng nghyd-destun gwaith ehangach Is-adran y Môr a Physgodfeydd. Lle y gall costau ychwanegol godi, byddant yn dod o gyllidebau rhaglenni presennol.

Fodd bynnag, mae swyddogion Llywodraeth Cymru hefyd yn gwneud gwaith cynllunio ar gyfer y ffordd y caiff swyddogaethau newydd, gan gynnwys o ddeddfwriaeth sylfaenol sy'n ymwneud ag ymadael â'r UE, eu cyflawni wrth inni adael cyfnod pontio'r UE. Bydd hyn yn cynnwys unrhyw ddeddfwriaeth newydd. Mae'n rhy gynnar i ddweud, ar hyn o bryd, beth fydd cwmpas a maint unrhyw newid. Dylai'r darlun fod yn gliriach pan fyddwn yn deall ein cydberthynas â'r UE yn y dyfodol.

Yr eiddoch yn gywir



Lesley Griffiths AS/MS

Gweinidog yr Amgylchedd, Ynni a Materion Gwledig
Minister for Environment, Energy and Rural Affairs

Ymateb Llywodraeth Cymru i adroddiad y Pwyllgor Deddfwriaeth, Cyfiawnder a'r Cyfansoddiad (a gyhoeddwyd ar 21 Mai 2020) ar Femorandwm Cydsyniad Deddfwriaethol Llywodraeth Cymru mewn perthynas â Bil Pysgodfeydd y DU 2019-21

Argymhelliad	Ymateb Llywodraeth Cymru
Argymhelliad 1. Dylai'r Gweinidog, fel mater o frys a chyn i Lywodraeth Cymru gyflwyno cynnig cydsyniad deddfwriaethol ar gyfer y Bil, egluro a chadarnhau pa ddarpariaethau penodol yn y Bil sydd eu hangen i gyflawni'r nod dymunol o sefydlu fframwaith cyffredin deddfwriaethol ar gyfer pysgodfeydd i'r DU gyfan.	Derbyn Rwy'n fodlon egluro hyn. Mae'r mwyafrif o Fil Pysgodfeydd y DU yn cynnwys darpariaethau sydd eu hangen i gyflawni'r nod dymunol o sefydlu fframwaith cyffredin ar gyfer pysgodfeydd i'r DU gyfan. Mae'n creu elfennau deddfwriaethol sylfaenol Fframwaith y DU ar gyfer rheoli a chefnogi pysgodfeydd, gan ddarparu un set o amcanion, dyletswyddau a phwerau. Bil fframwaith yw hwn. Mae'n cael ei gyflwyno yn lle'r Polisi Pysgodfeydd Cyffredin. Ceir darpariaethau sydd eu hangen ar gyfer Fframwaith Cyffredin Deddfwriaethol gwbl weithredol ar gyfer Pysgodfeydd i'r DU gyfan. Bydd y darpariaethau hyn yn gymwys ledled y DU, i bob gweinyddiaeth pysgodfeydd. Elfennau craidd y fframwaith cyffredin yw: <i>Cymalau 1 – 11 ac Atodlen 1 - Amcanion pysgodfeydd, datganiadau pysgodfeydd a chynlluniau rheoli pysgodfeydd</i> <i>Cymalau 12 – 13, Atodlenni 2 a 4 – Mynediad i bysgodfeydd Prydain a rheoleiddio cychod pysgota tramor</i> <i>Cymalau 14 – 22 ac Atodlen 3 – Trwyddedu cychod pysgota</i> <i>Cymalau 23 – 27 ac Atodlen 5 – Cyfleoedd pysgota</i> gan gynnwys darpariaethau ynghylch gwerthu cyfleoedd pysgota er mwyn sicrhau y gallwn fanteisio ar yr hyn a fydd, gobeithio, yn gyfran fwy o gwota i bysgotwyr o Gymru, ar ôl inni ymadael â'r Undeb Ewropeaidd (UE). Mae'r pwerau hyn yn cyfateb i bwerau'r Ysgrifennydd Gwladol. Mae'r cymalau a nodwyd uchod yn darparu i bedair gweinyddiaeth y DU gydweithio er mwyn datblygu polisiâu'r fframwaith cyffredin. Wedyn, aiff y Bil ymlaen i ddarparu nifer o bwerau neu ddulliau gweithredol sydd wedi'u breinio yn y gweinyddiaethau unigol er mwyn cynyddu hyd yr eithaf ar allu a phŵer pob gweinyddiaeth i reoli eu pysgodfeydd eu hunain. Caiff y dulliau hyn eu defnyddio i weithredu a chyflawni'r polisiâu a ddatblygwyd yn y fframwaith. Mae'r swyddogaethau gwneud rheoliadau hyn yn fwy gweithredol eu natur ond mae eu hangen er mwyn sicrhau y gallwn roi'r polisiâu y cytunwyd arnynt o fewn y fframwaith ar waith yng Nghymru, ond mewn ffordd sydd wedi'i theilwra orau i ddiwallu anghenion Cymru. Maent fel a ganlyn: <i>Cymal 33 ac Atodlen 6 – maent yn rhoi pwerau i bob un o weinyddiaethau'r DU roi cymorth ariannol er mwyn atgynhyrchu'r</i>

Argymhelliad	Ymateb Llywodraeth Cymru
	pwerau y mae'r cyrff hynny yn eu harfer ar hyn o bryd o dan Gronfa'r Môr a Physgodfeydd Ewrop. <i>Cymal 34 ac Atodlen 7</i> – maent yn galluogi Gweinidogion Cymru (gyda phwerau cyfatebol i'r Sefydliad Rheoli Morol a phob gweinyddiaeth bysgodfeydd) godi tâl am wasanaethau a ddarperir mewn cysylltiad â chyflawni swyddogaethau pysgodfeydd yn ehangach na chynt. Pwerau gweinyddol yw'r rhain i bob pwrpas, nad oes eu hangen ar gyfer y fframwaith ond a fydd yn ei gwneud yn bosibl i arian cyhoeddus gael ei reoleiddio a'i ddefnyddio'n well. <i>Cymalau 36 – 42 ac Atodlen 8</i> – maent yn darparu pwerau gwneud offerynnau statudol i bob gweinyddiaeth wneud darpariaeth ynghylch pysgodfeydd a dyframaethu. Mae'r rhain yn bwerau pwysig sy'n ein galluogi i ddiwygio deddfwriaeth yr UE a ddargedwir, heb geisio deddfwriaeth sylfaenol wrth i ni symud i ffwrdd oddi wrth reoli pysgodfeydd o dan y Polisi Pysgodfeydd Cyffredin tuag at reoli pysgodfeydd o dan y Cyd-ddatganiad Pysgodfeydd a chynlluniau rheoli pysgodfeydd. Wrth gwrs, byddai hyn yn ein galluogi i wyro oddi wrth yr UE petaem o'r farn bod angen gwneud hynny, rhoi rhwymedigaethau rhyngwladol ar waith neu ddal i fyny â'r UE, am ei bod yn amlwg bod deddfwriaeth ynglŷn â physgodfeydd yn datblygu'n barhaus. Mae'r pwerau gwneud rheoliadau hyn yn sicrhau bod gan bob gweinyddiaeth yr adnoddau sydd eu hangen arnynt i roi'r polisïau a'r targedau a luniwyd ac y cytunwyd arnynt o fewn y Cyd-ddatganiad Pysgodfeydd a'r cynlluniau rheoli pysgodfeydd ar waith. Felly, mae'n elfen bwysig o'r fframwaith cyffredin, sy'n ddigon hyblyg ar yr un pryd er mwyn i bob gweinyddiaeth allu sicrhau bod y rheoliadau a wneir yn benodol i anghenion a blaenoriaethau pob gweinyddiaeth. Mae <i>Cymal 44 ac Atodlen 9</i> yn cyflwyno diwygiadau arwyddocaol i Ddeddf y Môr a Mynediad i'r Arfordir 2009 mewn perthynas â rheoleiddio'r defnydd a wneir o adnoddau pysgodfeydd y môr. Mae'r diwygiadau yn rhoi pwerau gwneud gorchmynion newydd i Weinidogion Cymru reoli'r defnydd a wneir o adnoddau pysgodfeydd y môr er mwyn diogelu fflora a ffawna'r môr neu gynefinoedd morol. Mae'r pwerau hyn yn hollbwysig er mwyn i bysgodfeydd allu cael eu rheoli mewn ffordd hyblyg ac rydym yn bwriadu eu defnyddio cyn gynted â phosibl. Mae'r pwerau hyn yn cael eu rhoi i bob gweinyddiaeth bysgodfeydd. Byddwn yn dibynnu ar y rheoliadau a'r pwerau gwneud gorchmynion hyn er mwyn cyflwyno deddfwriaeth sydd ei hangen i roi'r polisïau y cytunwyd arnynt yn y fframwaith ar waith a darparu dulliau gweithredu cydgysylltiedig gyda'r gweinyddiaethau pysgodfeydd eraill, neu gyflawni ar yr un pryd â'r gweinyddiaethau pysgodfeydd eraill e.e. cyflwyno cynllun cymorth pysgodfeydd. Felly, mae'n ddoeth cymryd y pwerau hyn drwy'r Bil hwn hefyd a pheidio â mentro rhoi buddiannau Cymru o dan anfantais nes inni allu cyflwyno pwerau pellach mewn Bil Pysgodfeydd i Gymru.

Argymhelliad	Ymateb Llywodraeth Cymru
Argymhelliad 2. Cyn i Lywodraeth Cymru gyflwyno cynnig cydsyniad deddfwriaethol ar gyfer y Bil, dylai'r Gweinidog egluro'r canlynol: •pam mae Bil Pysgodfeydd i Gymru wedi'i ohirio tan adeg anhysbys yn y dyfodol, pan gofir mai safbwynt Llywodraeth Cymru oedd y byddai Bil yn cael ei gyflwyno o fewn y 12 mis nesaf; •yr amser fydd ei angen i baratoi Bil Pysgodfeydd i Gymru.	Derbyn Mae'n amlwg bod nifer o resymau pam mae dyddiad cyflwyno Bil Pysgodfeydd i Gymru wedi'i ohirio. Wrth gwrs, mae'r ffaith bod Bil Pysgodfeydd y DU wedi'i ohirio wedi cael sgil-ffaith ar ein gallu i gyflwyno Bil Pysgodfeydd i Gymru, am fod y Bil yng Nghymru yn dibynnu ar ymestyn cymhwysedd deddfwriaethol i'r Senedd. Rydym mewn cyfnod o gryn ansicrwydd i'n diwydiant pysgota. Mae COVID-19 eisoes wedi cael effaith sylweddol ar y diwydiant a'n cymunedau arfordirol ac nid yw effeithiau Brexit wedi'u teimlo eto. Oherwydd yr ansicrwydd ynglŷn â'r negodiadau parhaus ynghylch pysgodfeydd a'n cydberthynas â'r UE yn y dyfodol – mae'r sefyllfa rydym ynddi yn newid yn barhaus ac mae angen inni barhau i fod yn hyblyg ac yn ymatebol er mwyn sicrhau y gallwn fabwysiadu'r polisi cywir a chymryd y camau deddfwriaethol cywir ar yr adeg gywir. Rwy'n cytuno'n llwyr â'ch honiad yn eich adroddiad ynghylch yr angen i roi rhywfaint o sicrwydd i randdeiliaid ynglŷn ag amseriad polisi pysgodfeydd i Gymru a Bil priodol i Gymru. Bwriad y Llywodraeth hon yw cyflwyno Bil Pysgodfeydd i Gymru yn nhymor nesaf y Senedd. Bydd yr amser sydd ei angen i baratoi Bil yn cynnwys camau datblygu arferol Bil, gan gynnwys papur gwyn, a chaiff hyn ei lywio, o reidrwydd, gan amseriadau polisi pysgodfeydd i Gymru yn y dyfodol. Brexit a'n Moroedd oedd dechrau sgwrs barhaus â'n rhanddeiliaid yng Nghymru, a fydd yn llywio'r broses o ddatblygu polisi pysgodfeydd i Gymru yn y dyfodol. Rydym yn bwriadu parhau â'r sgwrs. Gohiriwyd cyhoeddi'r ymateb i ymgynghoriad Brexit a'n Moroedd oherwydd pandemig COVID-19. Rwy'n adolygu'r ymateb yng ngoleuni'r pandemig a'r ansicrwydd parhaus ynglŷn â phontio o'r UE.
Argymhelliad 3. Dylai'r Gweinidog esbonio, cyn i Lywodraeth Cymru gyflwyno cynnig cydsyniad deddfwriaethol ar gyfer y Bil, sut y bydd Bil Pysgodfeydd i Gymru yn y dyfodol yn gweithio o fewn fframwaith pysgodfeydd cyffredin i'r DU gyfan.	Derbyn Yn ogystal â nodi a chydgysylltu dull gweithredu cyffredin i'r DU gyfan, rôl y fframwaith pysgodfeydd yw cydnabod gallu pob llywodraeth i ddatblygu polisi wedi'i deilwra ar gyfer ei thiriogaeth unigol a chynnig cyfle iddynt ddod at ei gilydd ac ystyried sut y caiff hyn ei reoli ledled y DU. Bydd Bil Pysgodfeydd y DU yn rhoi'r darpariaethau deddfwriaethol craidd sydd eu hangen ar gyfer fframwaith cyffredin pysgodfeydd y DU. Un o elfennau allweddol y fframwaith yw Amcanion Pysgodfeydd y DU, sef set gyffredin o amcanion y mae angen inni weithio tuag atynt. Byddai angen i unrhyw Fil Pysgodfeydd i Gymru yn y dyfodol ystyried yr amcanion hyn. Mae'r Cyd-ddatganiad Pysgodfeydd yn darparu'n benodol i bob gweinyddiaeth gael ei pholisïau ei hun, wedi'u teilwra at ei hanghenion ei hun, er mwyn cyflawni'r amcanion, lle y bo angen.

Argymhelliad	Ymateb Llywodraeth Cymru
	O ganlyniad, byddwn yn disgwyl i ddarpariaethau allweddol y fframwaith, megis yr amcanion a'r Cyd-ddatganiad Pysgodfeydd, aros ym Mil y DU. Byddai Bil Pysgodfeydd i Gymru hefyd yn destun trafodaethau ynghylch ein polisi pysgodfeydd ar gyfer y dyfodol, y byddwn yn ei ddatblygu gyda rhanddeiliaid. Nes inni gael y sgysiau hynny, mae'n anodd rhagweld pa bwerau pellach yn union y byddai eu hangen arnom a sut y byddent yn gweithio o fewn y fframwaith pysgodfeydd cyffredin. Mae Gweinidogion Cymru wedi ymrwymo i ddull y fframwaith cyffredin ac, wrth gwrs, bydd unrhyw Fil Pysgodfeydd i Gymru yn y dyfodol yn ei ystyried. I ailadrodd, mae'n bwysig cofio bod rheoli pysgodfeydd yn fater datganoledig. Gweinidogion Cymru yn unig sydd â'r pŵer i arfer swyddogaethau a chyflwyno deddfwriaeth. Mae'r fframwaith yn parchu datganoli ac yn galluogi dulliau gweithredu gwahanol ledled y DU, lle y bo'n briodol, fel y nodir yn egwyddorion Cyd-bwyllgor y Gweinidogion.
Argymhelliad 4. Dylai'r Gweinidog wneud y canlynol: •ceisio gwelliant i'r Bil er mwyn mewnosod 'darpariaeth fachlud' yn y cymalau yn y Bil sy'n gymwys i Gymru erbyn 2024, er mwyn sicrhau bod eglurder yn y dyfodol ynglŷn â'r ffordd y caiff y deddfwriaeth sylfaenol ynglŷn â physgodfeydd yng Nghymru ei chymhwyso; rhoi gwybodaeth fanwl yn gyson i'r Pwyllgor am ei thrafodaethau â Llywodraeth y DU ynghylch gwelliant o'r fath.	Gwrthod Rwy'n cydnabod yn llawn y rheswm dros yr argymhelliad hwn ac yn cytuno y dylid rhoi eglurder ynglŷn ag amseriadau Bil Pysgodfeydd i Gymru a'i bod yn hanfodol bod hyn yn parhau i fod yn flaenoriaeth i'r Llywodraeth. Fel y nodais uchod, mae'r Llywodraeth hon yn bwriadu cyflwyno Bil Pysgodfeydd i Gymru yn rhymor nesaf y Senedd. Fel arfer, ystyrir cymalau machlud pan fo amserlen glir ar gyfer dileu darpariaethau i Gymru a chyflwyno rhai newydd yn eu lle ac, fel y nodais uchod, rydym mewn cyfnod o gryn ansicrwydd i'n diwydiant pysgota. Nid bwrw ymlaen â deddfwriaeth dim ond er mwyn gwneud hynny yw'r ffordd o ddarparu polisi na deddfwriaeth dda. Mae'n hollbwysig ein bod yn cymryd yr amser i fyfyrto a phwyso a mesur y sefyllfa fel y mae. Yn y cyfamser, bydd angen inni sicrhau bod gennym yr adnoddau sydd eu hangen i reoli'r heriau sy'n wynebu ein diwydiant pysgodfeydd o ganlyniad i Brexit (a COVID-19 bellach), felly mae angen inni gadw'r pwerau ym Mil y DU, cyhyd ag y gallai fod eu hangen arnom. Nid ydym am osod cymal machlud sy'n creu'r risg y collir pwerau allweddol i Gymru, drwy weithrediad awtomatig deddf. Rydym am gyflwyno deddfwriaeth yng Nghymru sydd wedi'i datblygu gan roi digon o amser i graffu arni a'i hystyried yn briodol. Nid wyf yn barod i geisio cymal machlud a allai roi diwydiant pysgota Cymru o dan anfantais o gymharu â gweddill y diwydiant yn y DU. Fodd bynnag, gallaf hefyd eich sicrhau nad yw'n fwriad gennyf gael y pwerau hyn sydd mewn Bil a gyflwynwyd gan Lywodraeth y DU am fwy o amser nag sydd ei angen a byddaf yn rhoi'r wybodaeth ddiweddaraf i'r Pwyllgor am y cynnydd sydd wedi'i wneud o ran cyflwyno Bil Pysgodfeydd i Gymru.

Argymhelliad	Ymateb Llywodraeth Cymru
Argymhelliad 5. Dylai'r Gweinidog egluro pam mae'n briodol gofyn i'r Senedd am ei chydysyniad i ddarpariaethau perthnasol y Bil os na chytunwyd ar y memorandwm cyd-ddealltwriaeth. Argymhelliad 6. Dylai'r Gweinidog roi diweddariadau rheolaidd i'r Pwyllgor ynghylch y cynnydd sy'n cael ei wneud o ran cwblhau'r Memorandwm Cyd-ddealltwriaeth, gan gynnwys mecanwaith datrys anghydfod.	Argymhelliad 5 – Derbyn Argymhelliad 6 – Derbyn Mae fy swyddogion yn gweithio gyda Defra a'r llywodraethau datganoledig eraill i fwrw ymlaen â'r gwaith o ddatblygu'r Memorandwm Cyd-ddealltwriaeth. Rydym yn pwysu am i gynnydd gael ei wneud o ran y mater hwn, a'm bwriad yw y caiff yr Aelodau gyfle i fwrw golwg dros y Memorandwm Cyd-ddealltwriaeth, mewn perthynas â chymal 23, cyn ei phenderfyniad ynghylch cydsynio. Byddaf yn rhoi diweddariadau rheolaidd i'r Pwyllgor ynghylch y cynnydd sy'n cael ei wneud o ran cwblhau'r Memorandwm Cyd-ddealltwriaeth, gan gynnwys mecanwaith datrys anghydfod.
Argymhelliad 7. Dylai'r Gweinidog ddarparu gwybodaeth, naill ai mewn dogfen atodol neu o fewn unrhyw gynnydd cydsyniad deddfwriaethol atodol, yn cyfiawnhau pam mae'n briodol cymryd pob un o'r pwerau gwneud rheoliadau i Weinidogion Cymru a geir yn y Bil, a'r weithdrefn a ddewiswyd ar gyfer pob pŵer gwneud rheoliadau.	Derbyn Byddaf yn darparu'r wybodaeth mewn dogfen atodol neu o fewn unrhyw Femorandwm Cydsyniad Deddfwriaethol Atodol.
Argymhelliad 8. Cyn i Lywodraeth Cymru gyflwyno cynnydd cydsyniad deddfwriaethol ar gyfer y Bil, dylai'r Gweinidog roi rhagor o eglurder ynglŷn â'r pwerau gwneud rheoliadau yn Atodlen 3 ac, yn benodol, o dan ba amgylchiadau y byddai Gweinidog Cymru yn ystyried ei bod yn	Derbyn Mae trwyddedu yn adnodd allweddol ar gyfer rheoli pysgodfeydd. Mae'n galluogi rheoleiddwyr i gymhwyso rheolaethau ar lefel y gweithgarwch pysgota masnachol. Mater datganoledig yw hwn, fodd bynnag, rydym wedi mabwysiadu dull gweithredu cydgysylltiedig, er mwyn sicrhau bod fframwaith clir ar gyfer trwyddedu pysgota yn y DU. Mae'r darpariaethau a'r pwerau yng nghymalau 14 i 17 ac Atodlen 3 i'r Bil yn disodli darpariaethau trwyddedu cyfatebol presennol a geir ar hyn o bryd yn Neddŵ Pysgod Môr (Cadwraeth) 1967 a Gorchymyn Trwyddedu Pysgota Môr 1992 mewn perthynas â chychod pysgota o Brydain. Maent hefyd yn gosod gofynion trwyddedu newydd ar

Argymhelliad	Ymateb Llywodraeth Cymru
angenrheidiol ac yn fuddiol arfer y pwerau hyn fel awdurdod trwyddedu pysgota môr.	gychod pysgota tramor sy'n pysgota o fewn terfynau pysgodfeydd Prydain sy'n ofynnol o ganlyniad i ymadawiad y DU â'r UE. Mae'r Bil yn gwneud diwygiadau canlyniadol i dri offeryn statudol trwyddedu sy'n bodoli eisoes, sef: Gorchymyn Pysgota Môr (Trwyddedu) 1992 (sy'n cynnwys pwerau i swyddogion pysgodfeydd môr Prydain. Rheoliadau Pysgota Môr (Trwyddedau a Hysbysiadau) 1994 (sy'n gwneud darpariaeth ar gyfer rhoi trwyddedau, a hysbysiadau a gyflwynir o dan drwyddedau); a Gorchymyn Trwyddedu Pysgota Môr (Amser ar y Môr) (Egwyddorion) 1993 (sy'n darparu ar gyfer cymhwyso egwyddorion wrth bennu nifer y diwrnodau y gellir eu treulio ar y môr mewn trwydded). Mae'r diwygiadau yn sicrhau y bydd y tri offeryn statudol hyn yn parhau i weithredu gyda'r pwerau trwyddedu newydd yn y Bil. Mae'r pŵer gwneud rheoliadau yn Atodlen 3 yn galluogi Gweinidogion Cymru i reoli'r system drwyddedu yng Nghymru a gwneud newidiadau yn y dyfodol os bydd angen, er mwyn sicrhau bod gennym system drwyddedu gadarn ar waith. Fodd bynnag, ar hyn o bryd ni fwriedir newid y ddarpariaeth a wneir yn y Bil na'r tri offeryn hyn. Mae'r Bil yn nodi fframwaith ond mae'n bosibl y byddwn am gyflwyno manylion pellach yn y dyfodol er mwyn helpu i redeg ein system drwyddedu yn effeithiol. Bydd rheoliadau gan gynnwys y ddarpariaeth a ddisgrifiwyd uchod yn amodol ar gymeradwyaeth y Senedd. Byddwn yn cynnwys y tabl y gofynnwyd amdano sy'n cyfiawnhau'r broses gymeradwyo sy'n gymwys i bob un o bwerau gwneud rheoliadau Gweinidogion Cymru yn y Memorandwm Cydsyniad Deddfwriaethol Atodol.
Argymhelliad 9. Dylai'r Gweinidog ymrwymo i osod datganiad ysgrifenedig gerbron y Senedd yn rhoi gwybod am unrhyw orchymyn perthnasol a wneir o dan adrannau 134A neu 134B o Ddeddf y Môr a Mynediad i'r Arfordir 2009 er mwyn sicrhau bod popeth yn agored ac yn dryloyw.	Gwrthod Bydd adran 135 o Ddeddf y Môr a Mynediad i'r Arfordir 2009, fel y'i diwygiwyd gan y Bil, yn darparu i Orchmynion a wneir o dan adrannau 134A a 134B gael ei gyhoeddi gan Weinidogion Cymru, gan sicrhau bod popeth yn agored ac yn dryloyw. Mae adran 135 yn ei gwneud yn ofynnol i Weinidogion Cymru gyhoeddi'r gorchymyn mewn ffordd sy'n debygol o'i ddwyn i sylw'r bobl hynny y bydd gwneud y gorchymyn yn effeithio arnynt, a fyddai'n cynnwys y Senedd. Byddai cyhoeddi yn cynnwys ei roi ar wefan Llywodraeth Cymru. Felly, yn fy marn i, nid oes angen yr ymrwymiad hwn.
Argymhelliad 10. Cyn i Lywodraeth Cymru gyflwyno cynnig cydsyniad deddfwriaethol ar gyfer y Bil, dylai'r Gweinidog ysgrifennu at y Pwyllgor er mwyn egluro pam nad oes angen i'r	Derbyn Oherwydd y cysylltiadau rhwng cymal 4 a chymal 23, gallaf ddeall pam mae'r Pwyllgor wedi codi'r mater hwn. Fodd bynnag, nid ydym o'r farn bod angen cydsyniad y Senedd. Mae a wnelo cymal 4 â Datganiad Pysgodfeydd yr Ysgrifennydd Gwladol a phennu polisiâu gan yr Ysgrifennydd Gwladol ynghylch sut y byddant yn cyflawni amcanion pysgodfeydd y DU, drwy arfer eu swyddogaethau, a all gynnwys swyddogaethau cwota'r DU a

Argymhelliad	Ymateb Llywodraeth Cymru
Senedd gydsynio i gymal 4 o'r Bil.	materion eraill a gedwir yn ôl. Felly, yn ein barn ni, nid oes angen i'r ddarpariaeth benodol hon gael cydsyniad. O ran y gydberthynas rhwng cymal 4 a chymal 23. O dan gymal 4, byddai'r Ysgrifennydd Gwladol yn pennu polisi Llywodraeth y DU a fydd yn nodi sut y bydd yr Ysgrifennydd Gwladol yn arfer swyddogaeth gwota'r DU o dan gymal 23. Ar y llaw arall, o dan gymal 23, bydd yr Ysgrifennydd Gwladol yn arfer swyddogaeth fwy gweithredol ei natur i bennu cyfleoedd pysgota ar gyfer pob cwch pysgota o Brydain a allai gynnwys darpariaeth ar gyfer ardal ddaearyddol a leolir yn gyfan gwbl yng Nghymru. Yn ein barn ni, nid dyma fwriad cymal 23, a dyna pam rydym wedi cytuno i sicrwydd gael ei roi yn y Memorandwm Cydddealltwriaeth ynglŷn â defnyddio'r pŵer.